

Caso asesinato Poentje Castro awe den Corte

ORANJESTAD (AAN): Awe mainta e sospechoso Anderson Rasmijn (36) lo mester presenta den sala di Corte di Husticia pa awor trata e caso penal cu Ministerio Publico a cuminsa contra dje. Anderson Rasmijn ta wordo acusa di a tira mata John Anthony Castro riba 22 December 2010. Despues di mas cu 10 aña, awor ta asina leu cu tin un sospechoso.


Varios biaha tabatin casonan pro forma caminda abogado mr. Carlo a pidi pa laga psiquiatra check Rasmijn pa cu su estado mental.

SOSPECHOSO TIN PROBLEMA MENTAL
A sali na cla cu Anderson Rasmijn ta un persona cu a haya tratamento for di psiquiatra na Respaldo. Esey tabata e motibo cu na

Respaldo, ningun di e psiquiatra no kier traha un raport pasobra nan a yega di atende Rasmijn. Esaki tabata e punto cu Hues tabata kier claridad pa mira si lo mester busca psiquiatra di afor. Finalmente e director di Respaldo, van Galen, a laga sa cu e mes lo traha un raport.

SCUCHA AUDIO CU POLIS TIN

Ta asina cu abogado mr. Carlo, anterior a haci peticionnan y Fiscal a nenga. Mr. Carlo a bisa Hues cu e ta persisti pa haya audio cu Recherche tin pa asina e por analisa esaki cu su cliente. E abogado a sigui bisa cu si acaso Fiscal ta nenga, e ta pidi Hues pa bisa Fiscal pa regla un forma caminda sin presencia di Recherche, e abogado cu su cliente Rasmijn por



scucha esakinan.

Fiscal a bisa Hues cu no por facilita audio. Esey ta un maneho fiho cu Ministerio Publico ta hiba den casonan penal. Pero Fiscal ta di acuerdo pa abogado hunto cu su cliente lo por

scucha e audio. El a bisa cu e lo bay papia cu Recherche pa regla esaki y lo laga mr. Carlo sa na unda esaki lo bay sosode.

POTRET DI ZAPATO

Abogado mr. Carlo tambe

a bisa cu for di e documentonan di e caso por compronde cu lo tin potret pero no e no a haya nada di potret. El a pidi Hues pa instrui Fiscal pa facilita potret.

Fiscal a bisa Hues cu si abogado kier lo por saca potret di e zapato y facilita esaki. Abogado a bisa cu lo ta bon idea pa tin potret di zapato. Hues tambe ta haya esaki un bon idea.

Awe a comenca henter mainta pa tratamento di e caso caminda lo bay haya sa kico realmente a pasa dia 22 December 2010. Tambe lo haya sa si Rasmijn, a base di e raport di psiquiatra, ta responsabel pa su acto of no y kico Fiscal ta bay exige pa Rasmijn. DIARIO lo informa lectornan di tur loka ta sosode den sala di Corte di Husticia.